

nions excédants toutes raisons naturelles par songes Machometiques, aussi aucune fois Dieu le createur par les ministres de ses messagiers de feu en flamme missiue vient à proposer aux sens extérieurs, mesmemēt à nos yeulx, les causes de future predictiō significatrices du cas futur, qui se doibt à cellui qui presaigne manifester. Car le presaigne qui se faict de la lumiere extérieure vient infalliblement à iuger partie avecques & moyennant le lume extérieur: cō bien vrayemēt que la partie qui semble auoir par l'œil de l'entendement, ce que n'est par la lesion du sens imaginatif: la raison est par trop euidente, le tout estre predict par afflation de diuinité, & par le moyen de l'esprit angelique inspiré à l'hōme prophetisant, rendāt oinctes de vaticinations, le venant à illuminer, luy esmouuant le deuant de la phantasie par diuerses nocturnes aparitiōs, q̄ par diurne certitude pphetise par administratiō astronomicque, cō ioincte de la sanctissime future prediction, ne cōsistāt ailleurs q̄ au courage libre. Viēt asture entēdre mō filz, que ie trouue par mes reuolutions que sont accordantes à reuellée inspiration, que le mortel glaue s'aproche de nous pour asture par peste, guerre plus horrible que